

LA MIRILLA

Unha aspiración cumprida para os adegueiros

X.M.RODRÍGUEZ, F. ALBO
 francisco.albo@lavoz.es

A Estación de Viticultura e Enoloxía de Galicia (Evega), ubicada no municipio ourensán de Leiro, vén acometendo dende o ano 1987 o seu traballo a prol do desenvolvemento tecnolóxico do sector vitivinícola galego, coas cinco denominacións de orixe da comunidade como referente. As importantes achegas para o sector, aos traballos de investigación e aos cursos de formación que imparte periodicamente engadiu o pasado 25 de xullo a acreditación ENAC. Trátase da primeira vez na que se consegue este recoñecemento, de carácter internacional, e onde deuse a coñecer este circunstancia no transcurso dunha visita que realizaron ás instalacións a conselleira de Medio Rural, **Rosa Quintana**, e o vicepresidente da Xunta, **Alfonso Rueda**.

A responsable de Medio Rural salientou a importancia de «acadar a acreditación internacional ENAC como centro punteiro para a realización de

O laboratorio da estación de enoloxía obtén a acreditación internacional

ensaios de produtos agroalimentarios» e referiuse Rosa Quintana ao feito de que «se trata dunha ferramenta establecida a nivel internacional para xerar confianza sobre a actuación de determinados organismos como laboratorios de ensaio, entidades de inspección ou verificadores ambientais, entre outros». A conselleira lembrou que a Evega



Francisco Rego (primeiro pola dereita), Juan Manuel Casares (terceiro) e Alfonso Losada (cuarto), con outras persoas, durante a visita de Alfonso Rueda e Rosa Quintana á estación de Leiro. FOTO ANTONIO CORTÉS



Un aspecto dos laboratorios da estación enolóxica ourensá



Análise dunha mostra de viño

xa contaba con recoñecemento oficial a nivel autonómico, estatal e europeo e que a nova distinción «non só reforza o traballo que leva a cabo este centro para dar solución aos problemas reais que plantea o sector vitivinícola galego senón que tamén lle outorga prestixio a un laboratorio que xa de por si é unha referencia para o sector».

Rueda, que visitaba por vez primeira a estación enolóxica, dixo que a Evega non é un centro «abondo coñecido» e que se precisaba potenciar máis o seu traballo e os seus cometidos. Salientou a relevancia da acreditación acadada e referiuse á importancia da mesma «no novo escenario económico europeo, onde cada día se exigen máis garantías

e onde cada vez hai que ser máis competitivos para exportar, que é un dos obxectivos de futuro para o sector».

Entre os participantes neste proxecto están o monfortino **Alfonso Losada**, xefe da sección de enoloxía da estación, e o responsable da sección de viticultura, **Francisco Rego**, unha persoa amplamente coñecida no ámbito da Ribeira Sacra.

O director de Evega salienta o traballo dos investigadores e o apoio da Xunta

O feito de que o laboratorio da estación de Leiro non contase ata agora coa nova certificación supuña un certo problema para os consellos reguladores das denominacións galegas —o da Ribeira Sacra entre eles—, que non sempre podían conseguir neste centro as análises homologadas dos seus viños. Este paso previo é imprescindible para conceder certificación oficial aos viños producidos nas súas adegas, que deben cumprir certos parámetros para obte-la. Por este motivo debía acudir a outros centros dotados da referida certificación. A nova categoría da estación de Leiro facilitará agora estes trámites.

O director da Evega, **Juan Manuel Casares**, sinalou que a acreditación do laboratorio da Evega outorgada pola ENAC (Entidad Nacional de Acreditación) «alcanza os parámetros clásicos nas análises de viños: ph, acidez total e volátil (método infravermello medio), grao alcohólico volumétrico (método infravermello medio e achegado), azúcre (método LISA 200) e dióxido de xofre (método fluxo continuo segmentado)». Na súa intervención, antes de guiar a visita das autoridades polas instalacións e o viñedo, Casares fixo un recoñecemento público «aos artifices deste paso en firme da Evega cara a conquistar o seu futuro: **José Antonio Feijó**, responsable de calidade; **Elvira Soto Díaz**, xefa de laboratorio, e **Alfonso Ribas**, secretario técnico do Ingacal (Instituto Galego de Calidade Alimentaria)». Casares tamén lembrou na súa intervención os proxectos e traballos que desenvolve a estación.

[a]pinguela I E S

CONTABILIDADE
 PÁXINAS WEB
 APLICACIÓNS INFORMÁTICAS
 MANTEMENTO DE REDES ...

¡MATRICÚLATE!

NOCTURNO
 FORMACIÓN DE CALIDADE PARA ADULTOS

FONDO SOCIAL EUROPEO

982 40 31 11
 ies.pinguela@edu.xunta.es